

A Presidencia de Lula en Brasil, obxecto de atención no Foro Iberoamericano do IGADI

Co título «Lula, Brasil e o Mundo», a VI edición do Foro Iberoamericano que organiza o Igadi (Instituto Galego de Análise e Documentación Internacional) en Baiona, efectuará unha aproximación ás principais claves do período de cambio que atravesa Brasil, tanto na orde económica, como social e política. Igualmente, analizarase o significado da política de Lula no contexto rexional e internacional, en especial o seu empeño por establecer unha estratexia mundial contra a pobreza e unha alianza entre os países do Sur para configurar outro mundo posible, como afirman en Porto Alegre.

O repaso do actual estado de cousas en Brasil será efectuado por José Gilberto Scandiucci, diplomático, doutor en Economía pola Universidade Estadual de Campinas, Brasil, profesor do Centro Universitario de Brasilia e do Instituto Rão Branco, entidade formativa do Ministerio de Relacións

Exteriores de Brasil.

O acto desenvolverase na Capitanía-Marinha de Baiona o próximo venres día 25 de febreiro a partir das 20,00 horas.

O Foro Iberoamericano chega á súa sexta edición. Nacido en 1999 co propósito de salientar o papel de Baiona no encontro entre as realidades europea e americana e abordar reflexións sobre

temas de actualidade e interese para ambos continentes, durante este período foron obxecto de atención as crises de Chile e Pinochet (Roberto Montoya), as expectativas do Mercosur (Martínez Puigal), a situación da emigración galega (responsables das áreas de emigración dos principais partidos galegos), a crise venezolana (Roberto Mansilla e Xosé Ferreiro), ou o período de cambio que se abriu recentemente en todo o cono suramericano (Rubén C. Lois González).

Fonte - Xulio Rios (IGADI)